

Expediente IET: P-21-825
Proxecto: Parque eólico Pico Seco e a súa infraestrutura de evacuación
Concello: Lalín (Pontevedra) e O Irixo (Ourense)
Promotor: Aerogeneración Galicia SL

INFORME DE IMPACTO E INTEGRACIÓN PAISAXÍSTICA

De acordo co artigo 37.1 da Lei 21/2013, do 9 de decembro, de avaliación ambiental, e co artigo 11.3 da Lei 7/2008, do 7 de xullo, de protección da paisaxe de Galicia, con data do 28/03/2022 o Servizo de Enerxías Renovables e Eficiencia Enerxética somete a informe do Instituto de Estudos do Territorio (IET) a documentación do proxecto de parque eólico Pico Seco e a súa infraestrutura de evacuación.

1. Antecedentes:

Con data do 27/12/2021 o IET emitiu un informe de impacto e integración paisaxística, de acordo co previsto no artigo 11.3 da Lei 7/2008. Nese informe indicábase que o estudo de impacto e integración paisaxística (EIIP) elaborado non se axustaba completamente ao disposto na Lei 7/2008, do 7 de xullo, de protección da paisaxe de Galicia, e ao Regulamento da Lei 7/2008. Así mesmo facíanse unha serie de consideracións sobre distintas medidas que debería adoptar o proxecto para minimizar os impactos e acadar unha mellor integración paisaxística.

2. Marco legal:

Consonte co artigo 15 da Lei 1/2021, do 8 de xaneiro, de ordenación do territorio de Galicia, e co artigo 28 do Decreto 244/2011, do 29 de decembro (modificado polo Decreto 42/2019, do 28 de marzo), o Instituto de Estudos do Territorio (IET) é o órgano competente para emitir este informe en materia de paisaxe, de acordo co que para tal efecto establecen os artigos 32 e 33 do Regulamento para o desenvolvemento da Lei 7/2008, do 7 de xullo, de protección da paisaxe de Galicia, aprobado polo Decreto 96/2020, do 29 de maio (RLPPG).

En desenvolvemento da Lei 7/2008 aprobáronse o Catálogo das paisaxes de Galicia (Decreto 119/2016, do 28 de xullo) e as Directrices de paisaxe de Galicia (Decreto 238/2020, do 29 de decembro).

De acordo co artigo 11.1 da Lei 7/2008, todos os proxectos que deban someterse a declaración de impacto ambiental deberán incorporar no estudo de impacto ambiental un estudo de impacto e integración paisaxística (EIIP), como documento específico no que se avaliarán os efectos e impactos que o proxecto poida provocar na paisaxe e as medidas de integración paisaxística propostas. O contido do EIIP debe axustarse ao disposto no artigo 11.2 da Lei 7/2008 e nos artigos 26 e seguintes do RLPPG.

3. Análise do EIIP, dos efectos do proxecto sobre a paisaxe e das medidas de integración paisaxística:

A documentación achegada polo Servizo de Enerxías Renovables e Eficiencia Enerxética consiste nun escrito de contestación (marzo 2022) ao anterior informe do IET e unha addenda ao EIIP (febreiro 2022). Nesta última lévase a cabo un estudo dos afloramentos rochosos no ámbito das posicións 1 e 5, concluíndose a non afección aos mesmos no caso da posición 1; analízase a visibilidade dende as AEIP máis afectadas, Camiño de Santiago,



miradoiros e núcleos de poboación; xustifícase como se incorporaron ao proxecto as directrices de paisaxe e propónse unha serie de barreiras vexetais para mitigar o impacto visual nos núcleos de poboación, así como a modificación da plataforma de montaxe da posición 5 para minimizar o impacto sobre os afloramentos rochosos.

Segundo as análises levadas a cabo na addenda, tanto as análises dos afloramentos rochosos como da visibilidade dende os núcleos, poden considerarse axeitadas as novas medidas propostas para reducir o impacto visual e a afección aos afloramentos rochosos. Se ben as especies arbóreas empregadas deberán ser autóctonas, polo que no canto do *Cupressus x leylandi*, deberá empregarse outra especie autóctona.

4. Conclusión:

Estes contidos veñen a completar o EIIP do proxecto, polo que pode considerarse cumprimentado o disposto no artigo 11.2 da Lei 7/2008 e nos artigos 26 e seguintes do RLPPG, considerándose axeitada a solución adoptada para reducir o impacto visual, se ben deberánse empregar especies autóctonas para as barreiras vexetais. No relacionado coa afección aos afloramentos rochosos, considérase axeitada a proposta de modificación da plataforma de montaxe da posición 5 para minimizar o impacto sobre este elemento de valor.

O principal impacto paisaxístico deste proxecto será a incidencia visual producida polos aeroxeradores, que pola súa forma e altura, serán visibles desde unha ampla extensión de terreos e a longas distancias; esta incidencia perdurará no tempo durante o período de explotación do parque, e verase incrementada polo efecto sinérxico derivado da presenza doutros parques eólicos na contorna. Neste caso, entre as zonas afectadas pola incidencia visual cabe destacar a AEIP Serra do Candán e Montes do Testeiro, miradoiros, Camiño de Santiago e núcleos máis próximos. Esta incidencia visual, aínda que non pode ser mitigada con medidas correctoras agás nos núcleos rurais, non supón un impacto crítico.

En todo caso, de acordo co artigo 30.3 do RLPPG, as medidas de integración paisaxística deberán quedar oportunamente recollidas no proxecto como é a creación de barreiras vexetais.

José Luís Álvarez Vicente
Xefe do Servizo de Planificación da Paisaxe

José Antonio Serantes Barbeito
Director do Departamento Técnico de Estudos

Visto e conforme, Enrique Luís de Salvador Sánchez
Director do Instituto de Estudos do Territorio

(Na data da sinatura electrónica)

